

2494

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

魏

陳記室

第二十三冊

U. 23

PL2492

荆暗室集

東記室集

夏辛

陳記室集

陳記室集題辭

何進謀誅宦官召兵四方陳孔璋時
爲主簿讜言禍害其意智豈讓曹操
哉棲身冀州爲袁本初草檄詆操心
誠輕之奮其怒氣辭若江河及窮窘
歸操預管記室移書吳會卽盛稱北

方無異劇秦美新文人何嘗惟所用
之茂惡爾矛夷懌相齟固恒態也孔
璋詩賦非時所推高武軍之賦久乃
見許於葛稚川今亦不全他賦絕無
空羣之名詩則飲馬游覽諸篇稍見
寄託然在建安諸子中篇最寂寥子

桓兄弟亦少酬贈元瑜傷寡婦仲宣
好驢鳴沒而繫思不可得也彼所出
塵惟章表書記孟德善用入長鼓厲
風雲遂捐宿憾然魏武奸雄生死欺
人獨孔璋斥其奄醜士衡笑其香履
足令垂頭帖耳後世卽有善罵者俱

不及也

婁東張溥題

陳記室集目錄

賦

武軍賦

又

又

又

又

神武賦
有序

止欲賦

神女賦

大暑賦

瑪瑙勒賦有序

迷迭賦

柳賦

鸚鵡賦

上書

爲袁紹上漢帝書

書

爲袁紹與公孫瓚書

更公孫瓚與子書

爲曹洪與世子書

答張紘書

牋

答東阿王牋

檄

爲袁紹檄豫州文

檄吳將校部曲文

版文

爲袁紹拜烏丸三王爲單于版文

設難

應譏

樂府

飲馬長城窟行

詩

遊覽二首

宴會

附錄

本傳

東已室集

目錄

三

陳記室集目錄終

陳記室集卷全

魏廣陵陳琳孔璋著

明太倉張溥天如閱

賦

武軍賦有序

迴天軍於易水之陽以討瓚焉鴻溝叅周鹿菰
十里荐之以棘爲建修櫓干青霄竈深隧下三
泉飛雲梯衡神鈎之具不在吳孫之篇三畧六
韜之術者凡數十事秘莫得聞也乃作武軍曰

赫赫哉烈烈矣於此武軍當天符之佐運承斗
剛而曜震漢季世之不辟青龍紀乎大荒熊狼
競以拏攫神寶播乎鎬京於是武臣赫然颺炎
天之隆怒叫諸夏而號八荒爾乃擬北落而樹
表晞壘壁以結營百校羅峙千部列陳彌方城
掩平原於是啓明戒旦長庚告昏火烈具舉鼓
角並震千徒從唱億夫求和聲訇隱而動山光
赫奕以燭夜其刃也則楚金越冶棠谿名工清
堅皓鏖脩刺銳鋒陸陷藥犀水截輕鴻鎧則東

胡闕輦百煉精剛，函師振旅，韋人制縫，玄玄縹
甲，灼爍流光，弩則幽韞，筋角恒山，壓幹通肌，暢
骨崇縕，曲煙大黃，沈紫直矢，輕弦當鋒，摧決貫
遐洞堅，其弓則烏號，越耗繁弱，角端象弭，繡質
哲桴文身，矢則申息，肅慎箇輅，空疏焦銅，毒鋏
麗轂，撻輶馬則飛雲，絕景直髻，駟駢駁龍，紫鹿
文的，躡魚走駿，驚風火秋步象，雲浮若乃清道整列，
按節徐行，龍姿鳳峙，灼有遺英。

又

鈎車轆轤九牛轉牽牽雷響激折櫓倒垣其攻
也則飛梯行雲臨閣靈構上通紫電下過三壚
蘊隆旣備越有神鈎排雷衝則高烈炬然
則頓名樓

又

衝鈎競進熊虎爭先墮垣百疊敝樓數千炎燧
四舉元戎齊登

又

整行按律決敵中原八部方置山布星陳干戈

森其若林，牙旗翻以如繪。

又

南轅反旆，爰振其旅。胡馬駢足，戎車齊軌。

神武賦 有序

建安十有二年，大司空武平侯曹公東征烏丸。六軍被介，雲輜萬乘，治兵易水，次於北平，可謂神武奕奕，有征無戰者已。

仁盤桓以淹次，乃申命而後征。覲狄民之故土，追大晉之遐蹤。惡先穀之懲寇，善魏絳之誅戎。

受金石而弗伐，蓋禮樂而思終陵九城而上濟。
起齊軌乎玉繩，車軒麟於雷室。騎浮厲乎雲宮，
暉曜連乎白日。旂旄繼於電光，旆旣軼乎白狼。
殿未出乎盧龍，威凌天地。勢括十衝，單鼓未伐。
虜已潰崩，克俊馘首。梟其魁雄，爾乃總輯環珍。
茵氊幕幄，攘璵帶佩。不飾雕琢，華璫玉瑤。金麟
牙琢文貝，紫瑛縹碧。玄綠黼錦，續組罽毼。衣服
止欲賦
媛哉逸女，在余東濱。色曜春華，豔過碩人。乃遂

古其寡儔固當世之無鄰允宜國而甯家實君子之攸嬪伊余情之是悅志荒溢而傾移宵炯炯以不寐晝舍食而忘飢歎北風之好我美携手之同歸忽日月之徐邁庶枯楊之生稊道攸長而路阻河廣漾而無梁雖企予而欲往非一葦之可航展余轡以言歸含惜瘁而就牀忽假瞑其若寐夢所懽之來征魂翩翩以遙懷若交好而通靈

神女賦

漢三士之建安荆野蠢而作仇贊皇師以南假
濟漢川之清流感詩人之攸歎想神女之來遊
儀營魄於髣髴託嘉夢以通精望陽侯而滉瀟
覩玄麗之軼靈文絳蚪之奕奕鳴玉鸞之嚶嚶
答玉質於苕華擬豔姿於薜榮感仲春之和節
歎鳴鴈之嗶嗶申握椒以貽予請同宴乎粵房
苟好樂之嘉合永絕世而獨昌旣歎爾以豔采
又悅我之長期順乾坤以成性夫何若而有辭

大暑賦

土潤溽以歆蒸時渙忍以溷溫風鬱其彤彤譬

炎火之陶燭

瑪瑙勒賦有序

五官將得瑪瑙以爲寶勒美其英綵之光豔也
使琳賦之

記瑤漢之寶岸臨赤水之朱波爾乃他山爲錯

荆和爲理制爲寶勒以御君子北堂抄誤寫魏文數語爲琳作

今據御覽正之

迷迭賦

立碧莖之娜婀舒綵條之蜿蜒下扶疎以布蔭
上綺錯而交紛匪荀方之可樂寔來儀之麗閑
動容飾而發微穆斐斐以承顏

柳賦

偉姿逸態英豔妙奇綠條縹葉雜遘纖麕龍鱗
鳳翼綺錯交施蔚曇曇其杳藹象翠蓋之葳蕤

鸚鵡賦

咨乾坤之兆物萬品錯而殊形有逸姿之令鳥
含嘉淑之哀聲抱振鷺之素質被翠羽之縹精

琳又有太荒賦曰假龜筮
以貞吉問神諗以休祥

上書

爲袁紹上漢帝書

臣聞昔有哀歎而霜隕悲哭而城崩者每讀其書謂爲信然。於今況之。乃知妄作。何者。臣出身爲國。破家立事。至於懷忠獲繫。抱信見疑。晝夜長吟。剖肝泣血。曾無崩城隕霜之應。故鄒衍杞婦何能感徹。臣以負薪之資。拔於陪隸之中。奉職憲臺。擢授戎校。常侍張讓等滔亂天常。侵奪朝威。賊害忠德。扇動奸黨。故大將軍何進忠國。

疾亂。義心赫怒。以臣頗有一介之節。可責以鷹犬之功。故授臣以督司。諮臣以方畧。臣不敢畏憚。強禦避禍求福。與進合圖。事無違異。忠策未盡。而元帥受敗。太后被質。宮室焚燒。陛下聖德幼冲。親遭厄困。時進旣被害。師徒喪沮。臣獨將家兵百餘人。抽戈承明。竦劒翼室。虎叱羣司。奮擊凶醜。曾不浹辰。罪人斯殄。此誠愚臣效命之一驗也。會董卓乘虛所圖。不軌。臣父兄親從。並當大位。不憚一室之禍。苟惟甯國之義。故遂解

節出奔。創謀河外。時卓方貪結外援。招悅英豪。故即臣渤海。申以軍號。則臣之與卓。未有纖芥之嫌。若使苟欲滑泥揚波。偷榮求利。則進可以享竊祿位。退無門戶之患。然臣愚所守。志無傾奪。故遂引會英雄。與師百萬。飲馬孟津。軟血漳河。會故冀州牧韓馥。懷挾逆謀。欲專權勢。絕臣軍糧。不得踵係。至使猾虜肆毒。害及一門。尊卑大小。同日并戮。鳥獸之情。猶知號呼。臣所以蕩然忘哀。貌無隱戚者。誠以忠臣之節。道不兩立。

顧私懷已。不能全功。斯亦愚臣破家殉國之二、
驗也。又黃巾十萬。焚燒青兗。黑山張楊。蹈藉異、
域。臣乃旋師。奉辭伐畔。金鼓未震。狡敵知亡。故、
韓馥懷懼。謝咎歸土。張楊黑山。同時乞降。臣時、
輒承制竊比竇融。以議郎曹操權領兗州牧。會、
公孫瓚師旅南馳。陸掠北境。臣卽星駕席卷。與、
瓚交鋒。假天之威。每戰輒克。臣備公族子弟。生、
長京輦。頗聞俎豆。不習干戈。加自乃祖先臣以、
來。世作輔弼。咸以文德盡忠。得免罪戾。臣非與、

瓚角戎馬之執。爭戰陣之功者也。誠以賊臣不誅。春秋所貶。苟云利國。專之不疑。故冒踐霜雪。不憚劬勤。實庶一捷之福。以立終身之功。社稷未定。臣誠恥之。太僕趙岐。銜命來征。宣明陛下含弘之施。蠲除細故。與下更新。奉詔之日。引師南轅。是臣畏怖天威。不敢怠慢之三驗也。又臣所上將校。率皆清英宿德。令名顯達。登鋒履刃。死者過半。勤恪之功。不見書列。而州郡牧守。競盜聲名。懷持二端。優游顧望。皆列土錫圭。跨州

連郡。是以遠近狐疑。議論紛錯者也。臣聞守文之世。德高者位尊。倉卒之時。功多者賞厚。陛下播越非所。洛邑乏祀。海內傷心。志士憤惋。是以忠臣肝腦塗地。肌膚橫分。而無悔心者。義之所感故也。今賞加無勞。以攜有德。杜黜忠功。以疑衆望。斯豈腹心之遠圖。將乃讒慝之邪說。使之然也。臣爵爲通侯。位二千石。殊恩厚德。臣旣叨之。豈敢闕覲重禮。以希彤弓旅矢之命哉。誠傷偏裨列校。勤不見紀。盡忠爲國。翻成重愆。斯蒙

恬所以悲號於邊獄。白起歔歔於杜郵也。太傅
日磬位爲師保。任託東征。而耗亂王命。寵任非
所。凡所舉用。皆衆所捐棄。而容納其策。以爲謀
主。令臣骨肉兄弟。還爲讐敵。交鋒接刃。構難茲
甚。臣雖欲釋甲投戈。事不得已。誠恐陛下日月
之明。有所不照。四聰之聽。有所不聞。乞下臣章
咨之羣賢。使三槐九棘。議臣罪戾。若以臣今行
權爲釁。則桓文當有誅絕之刑。若以衆不討賊
爲賢。則趙盾可無書弑之貶矣。臣雖小人。志守

一介若使得申明本心不愧先帝則伏首歐刀
塞衣就鏖臣之願也惟陛下垂尸鳩之平絕邪
諂之論毋令愚臣結恨三泉。

書

爲袁紹與公孫瓚書

孤與足下既有前盟舊要申之以討亂之誓愛
過夷叔分著丹青謂爲旅力同仇足踵齊晉故
解印釋紱以北帶南分割膏腴以奉執事此非
孤赤情之明驗邪豈寤足下棄烈士之高義尋
禍亡之險蹤輒而改慮以好易怨盜遣士馬犯
暴豫州始聞甲卒在南親臨戰陣懼於飛矢迸
流狂刃橫集以重足下之禍徒增孤子之咎釁

也故爲薦書懇惻冀可改悔而足下逸然自逸
矜其威詐謂天罔可吞豪雄可滅果令貴弟殞
於鋒刃之端斯言猶在於耳而足下曾不尋討
禍源克心罪已苟欲逞其無疆之怒不顧逆順
之津匿怨害民騁於余躬遂躍馬控弦處我疆
土毒徧生民辜延白骨孤辭不獲已以登界橋
之役是時足下兵氣霆震駿馬電發僕師徒肇
合機械不嚴彊弱殊科衆寡異論假天之助小
戰大克遂陵躡奔背因壘館穀此非天威隸謀

福豐有禮之符表乎足下志猶未厭乃復糾合
餘燼率我蜚賊以焚燕渤海孤又不獲甯用及
龍河之師羸兵前誘大軍未濟而足下膽破衆
散不鼓而敗兵衆擾亂君臣並奔此又足下之
爲非孤之咎也自此以後禍隙彌深孤之師旅
不勝其忿遂至積尸爲京頭顱滿野愍彼無辜
未嘗不慨然失涕也後比得足下書辭意婉約
有改往修來之言僕旣欣於舊好克復且愍兆
民之不甯每輒引師南駕以順簡書弗盈一時

而北邊羽檄之文未嘗不至孤是用痛心疾首
靡所錯情夫處三軍之帥當列將之任宜令怒
如嚴霜喜如時雨臧否好惡坦然可觀而足下
二○三○其○德○彊○弱○易○謀○急○則○曲○躬○緩○則○放○逸○行○無
定○端○言○無○質○要○爲○壯○士○者○固○若○此○乎○旣○乃○殘○殺
老○弱○幽○土○憤○怨○衆○叛○親○離○予○然○無○黨○又○烏○丸○滅
貊○皆○與○足○下○同○州○僕○與○之○殊○俗○各○奮○迅○激○怒○爭
爲○鋒○銳○又○東○西○鮮○卑○舉○踵○來○附○此○非○孤○德○所○能
招○乃○足○下○驅○而○致○之○也○夫○當○荒○危○之○世○取○干○戈

之險。內違同盟之誓。外失戎狄之心。兵興州壤
禍發蕭牆。將以定霸。不亦難乎。前以西山陸梁
出兵平討。會麴義餘殘。畏誅逃命。故遂住大軍
分兵撲蕩。此兵孤之前行。乃界橋舉旗。拔壘先
登。制敵者也。始聞足下鑄金紆紫。命以元帥。謂
當因茲奮發。以報孟明之耻。是故戰夫引領竦
望。旌旆恠遂。含光匿影。寂爾無聞。卒臻屠滅。相
爲惜之。夫有平天下之怒。希長世之功。權御師
徒。帶養戎馬。叛者無討。服者不收。威懷並喪。何

以立名。今舊京克復。天罔云補。罪人斯亡。忠幹翼化。華夏儼然。望於穆之作。將戢干戈。放散牛馬。足下獨何守區區之土。保軍內之廣。甘惡名以速朽。亡令德之久長。壯而籌之。非良策也。宜釋憾除嫌。敦我舊好。若斯言之玷。皇天是聞。

更公孫瓚與子書

瓚夢薊城崩。知必敗。乃間使與子續書。紹侯者得之。使陳琳更其書。

蓋聞在昔。衰周之世。僵尸流血。以爲不然。豈意今日身當其衝。袁氏之攻。似若神鬼。鼓角鳴於

地中。梯衝舞吾樓上。日窮月蹶。無所聊賴。汝當碎首於張燕。速致輕騎到者。當起烽火於北。吾當從內出。不然。吾亡之後。天下雖廣。汝欲求安足之地。其可得乎。

爲曹洪與世子書

十一月五日。洪白前初破賊情。後意奢說事。頗過其實。得九月二十日書。讀之喜。咲把翫無厭。亦欲令陳琳作報琳頃多事。不能得。爲念欲遠以爲懽。故自竭老夫之思。辭多不可一二粗舉。

大綱以當談笑。漢中地形實有險固。四嶽三塗。皆不及也。彼有精甲數萬。臨高守要。一夫揮戟。萬人不得進而我軍過之。若駭鯨之決細網。奔兕之觸魯縞。未足以喻其易。雖云王者之師。有征無戰。不義而彊。古人常有故。唐虞之世。蠻夷猾夏。周宣之盛。亦讐大邦。詩書歎載。言其難也。斯皆憑阻恃遠。故使其然。是以察茲地勢。謂爲中材處之。殆難。倉卒來命。陳彼妖惑之罪。序王師曠蕩之德。豈不信然。是夏殷所以喪。苗扈所

以斃。我之所以克彼。之所以敗也。不然。商周何以不敵哉。昔鬼方聾昧。崇虎讒囚。殷辛暴虐。三者皆下科也。然高宗有三年之征。文王有退修之軍。盟津有再駕之役。然後殪戎勝殷。有此武功焉。未有星流景集。飈奮霆擊。長驅山河。朝至暮捷。若今者也。由此觀之。彼固不逮。下愚則中才之守。不然明矣。在中才則謂不然。而來示乃以爲彼之惡稔。雖有孫田墨矦。猶無所救。竊又疑焉。何者。古之用兵。敵國雖亂。尚有賢人。則不

伐也。是故三仁未去。武王還師。宮奇在虞。晉不加戎。季梁猶在。彊楚挫謀。槩至衆賢奔紂。三國爲墟。明其無道有人。猶可救也。且夫墨子之守。縈帶爲垣。高不可登。折箸爲械。堅不可入。若乃距陽平。據石門。攄八陣之列。騁奔牛之權。焉肯土崩魚爛哉。設令守無巧拙。皆可攀附。則公輸已陵宋城。樂毅已拔卽墨矣。墨翟之術何稱。田單之智何貴。老夫不敏。未之前聞。蓋聞過高唐者。效王豹之謳。游濰渙者。學藻績之綵。閒自入

益部。仰司馬揚王之遺風。有子勝斐然之志。故頗奮文辭。異於他日。恠乃輕其家。邱謂爲倩人。是何言歟。夫駉驥垂耳於垆牧。鴻雀戢翼於汙池。褻之者固以爲囹圄之凡鳥。外廐之下乘也。及其整蘭筋。揮勁翮。陵厲清浮。顧眄千里。豈可謂其借翰於晨風。假足於六駮哉。恐猶未信。邱言必大喙也。洪白。文帝序曰。上平定漢中。族父都護還書與余。盛稱彼方土地形勢。觀其辭如陳琳所叙爲也。

答張紘書

絃見楠榴枕愛其文爲作賦時琳在北見之以示人曰此吾鄉張子綱所作也後絃見琳作武軍賦應機論與琳書深歎美之琳乃答

自僕在河北與天下隔此間率少於文章易爲雄伯故使僕受此過差之譚非其實也今景興在此足下與子布在彼所謂小巫見大巫神氣盡矣。

牋

答東阿王牋

琳死罪死罪。昨加恩厚命，并示龜賦，披覽粲然。君侯體高俗之材，秉青萍干將之器。拂鐘無聲，應機立斷。此乃天然異稟，非鑽仰者所庶幾也。音義既遠，清辭妙句，焱絕煥炳，譬猶飛兔流星，超山越海，龍驥所不敢追。况於駑馬，可得齊足哉！夫聽白雪之音，觀綠水之節，然後東野巴人，蚩鄙益著，載歡載笑，欲罷不能。謹韜櫝玩耽，以

爲吟頌琳死罪死罪

檄

爲袁紹檄豫州文

左將軍領豫州刺史郡國相守蓋聞明主圖危
以制變忠臣慮難以立權是以有非常之人然
後有非常之事有非常之事然後能立非常之
功夫非常者固非常人所擬也曩者彊秦弱主
趙高執柄專制朝權威福由已時人迫脅莫敢
正言終有望夷之敗祖宗焚滅污辱至今永爲
世鑒及臻呂后季年產祿專政內兼二軍外統

梁趙擅斷萬機。決事省禁。下陵上替。海內寒心。
於是絳侯朱虛。興兵奮怒。誅夷逆暴。尊立太宗。
故能道化興隆。光明顯融。此則大臣立權之明
表也。司空曹操祖父中常侍騰。與左悺徐璜並
作妖孽。饕餮放橫。傷化虐民。父嵩乞匄。携養。因
賍假位。輿金輦璧。輸貨買權。門竊盜鼎司。傾覆重
器。操贅閹遺醜。本無懿德。獠狡鋒協。好亂樂禍。
幕府董統鷹揚。掃除凶逆。續遇董卓。侵官暴國。
於是提劔揮鼓。發命東夏。收羅英雄。棄瑕取用。

故遂與操同諮合謀。授以裨師。謂其鷹犬之才。爪牙可任。至乃愚佻短畧。輕進易退。傷夷折衄。數喪師徒。幕府輒復分兵命銳。修完補輯。表行東郡。領兗州刺史。被以虎文獎。蹙威柄。冀獲秦師一尅之報。而操遂乘資跋扈。肆行凶忒。割剝元元。殘賢害善。故九江太守邊讓。英才俊偉。天下知名。直言正色。論不阿諂。身首被梟懸之誅。妻孥受灰滅之咎。自是士林憤痛。民怨彌重。一夫奮臂。舉州同聲。故躬破於徐方。地奪於呂布。

彷徨東裔。蹈據無所。幕府推彊幹弱枝之義。且不登叛人之黨。故復援旌擐甲。席卷赴征。金鼓響震。布衆奔沮。拯其死亡之患。復其方伯之位。則幕府無德於充土之民。而有造于操也。後會鸞駕反旆。羣虜寇攻。時冀州方有北鄙之警。匪遑離局。故使從事中郎徐勛就發遣操。使繕修郊廟。翊衛幼主。操便放志。專行脅遷。當御省禁。卑侮王室。敗法亂紀。坐領三臺。專制朝政。爵賞由心。刑戮在口。所愛光五宗。所惡滅三族。羣

談者受顯誅。腹議者蒙隱戮。百寮鉗口。道路以目。尚書紀朝會。公卿充員品而已。故太尉楊彪典厯二司。享國極位。操因緣眦睚。被以非罪。榜楚參并五毒。備至。觸情任忒。不顧憲網。又議郎趙彥忠諫直言。義有可納。是以聖朝含聽。改容加錫。操欲迷奪明時。杜絕言路。擅收立殺。不俟報聞。又梁孝王先帝母昆墳陵尊顯。桑梓松柏。猶宜肅恭。而操帥將校吏士。親臨發掘。破棺裸尸。掠取金寶。至今聖朝流涕。士民傷懷。操又特

置發邱中郎將摸金校尉所過隳突無骸不露
身處三公之位而行桀虜之態汙國虐民毒施
人鬼加其細政慘苛科防互設繒繳充蹊坑穽
塞路舉手挂網羅動足觸機陷是以充豫有無
聊之民帝都有吁嗟之怨歷觀載籍無道之臣
貪殘酷烈於操爲甚幕府方詰外奸未及整訓
加緒含容冀可彌縫而操豺狼野心潛包禍謀
乃欲摧撓棟梁孤弱漢室除滅忠正專爲梟雄
往者伐鼓北征公孫瓚疆寇桀逆拒圍一年擄

因其未破。陰交書命。外助王師。內相掩襲。故引
兵造河。方舟北濟。會其行人發露。瓚亦梟夷。故
使鋒芒挫縮。厥圖不果。爾乃大軍過蕩西山。屠
各左校。皆束首奉質。爭爲前登。犬羊殘醜。消淪
山谷。於是操師震懼。晨夜逋遁。屯據敖倉。阻河
爲固。欲以螳螂之斧。禦隆車之隧。幕府奉漢威
靈。折衝宇宙。長戟百萬。胡騎千羣。奮中黃育獲
之士。騁良弓勁弩之勢。并州越太行。青州涉濟
漯。大軍汎黃河而角其前。荊州下宛葉而犄其

後雷震虎步。並集虜庭。若舉炎火以炳飛蓬。覆
滄海以沃燐炭。有何不滅者哉。又操軍吏士其
可戰者。皆自幽冀。或故營部曲。或怨曠思歸。流
涕北顧。其餘充豫之民。及呂布張揚之遺衆。覆
亡迫脅。權時苟從。各被創夷。人爲讐敵。若廻旆
方徂。登高岡而擊鼓吹。揚素揮以啓降路。必土
崩瓦解。不俟血刃。方今漢室陵遲。綱維弛絕。聖
朝無一介之輔。股肱無折衝之勢。方畿之內。簡
練之臣。皆垂頭搨翼。莫所憑恃。雖有忠義之佐。

脅於暴虐之臣。焉能展其節。又操持部曲精兵
七百圍守宮闕。外託宿衛。內實拘執。懼其篡逆
之萌。因斯而作。此乃忠臣肝腦塗地之秋。烈士
立功之會。可不勗哉。操又矯命稱制。遣使發兵
恐邊遠州郡。過聽而給。與彊寇弱主。違衆旅叛。
舉以喪名。爲天下笑。則明哲不取也。即日幽并
青冀四州並進。書到荊州。便勒見兵。與建忠將
軍。協同聲勢。州郡各整戎馬。羅落境界。舉師揚
威。並匡社稷。則非常之功。於是乎著。其得操首

言集 卷全 三
者封五千戶侯賞錢五十萬部曲偏裨將校諸
吏降者勿有所問廣宣恩信班揚符賞布告天
下咸使知聖朝有拘偏之難如律令

檄吳將校部曲文

年月

朔日

子尚書令或告江東諸將校部曲及孫

權宗親中外蓋聞禍福無門惟人所召夫見幾
而作不處凶危上聖之明也臨事制變困而能
通智者之慮也漸漬荒沈往而不返愚者之蔽
也是以大雅君子居安思危以遠咎悔小人臨

禍懷佚以待死亡。二者之量。不亦殊乎。孫權小
子。未辨菽麥。要領不足以膏齊斧。名字不足以
滂簡墨。譬猶鰕卵始生。翰毛而便。陸梁放肆。顧
行吠主。謂爲舟楫。足以距皇威。江湖可以逃靈
誅。不知天網設張。以在綱目。爨鑊之魚。期於消
爛也。若使水而可恃。則洞庭無三苗之墟。子陽
無荆門之敗。朝鮮之壘。不刊南越之旌。不拔昔
夫差承閩閩之遠跡。用申胥之訓兵。棲越會稽。
可謂彊矣。及其抗衡上國。與晉爭長。都城屠於

勾踐武卒散於黃池。終於覆滅。身罄越軍。及吳王濞驕恣屈彊。猖獗始亂。自以兵強國富。勢凌京城。太尉帥師。甫下滎陽。則七國之軍瓦解。冰泮。滌之罵言。未絕於口。而丹徒之刃。以陷其胸。何則。天威不可當。而悖逆之罪重也。且江湖之衆。不可恃也。自董卓作亂。以迄於今。將三十載。其間豪傑縱橫。熊據虎踞。彊如二袁。勇如呂布。跨州連郡。有威有名。十有餘輩。其餘鋒捍特起。鸛視狼顧。爭爲梟雄者。不可勝數。然皆伏鉄嬰。

鉞首腰分離。雲散原燎罔有孑遺。近者關中諸將復相合聚。續爲叛亂。阻二華據河渭。驅率羗胡齊鋒東向。氣高志遠。似若無敵。丞相秉鉞鷹揚。順風烈火。元戎啓行。未鼓而破。伏尸千萬。流血漂杙。此皆天下所共知也。是後大軍所以臨江而不濟者。以韓約馬超逋逸。迸脫走還涼州。復欲鳴吠。逆賊宋建僭號河首。同惡相救。並爲脣齒。又鎮南將軍張魯負固不恭。皆我王誅所當先加。故且觀兵旋旆。復整六師。長驅西征。致

天下誅。偏將涉隴。則建約梟夷。矜首萬里。軍八
散關。則群氏率服。王侯豪帥。奔走前驅。進臨漢
中。則陽平不守。十萬之師。土崩魚爛。張魯逋竄。
走入巴中。懷恩悔過。委質還降。巴夷王朴胡賓
邑侯杜濩各帥種落。共舉巴郡。以奉王職。鉦鼓
一動。二方俱定。利盡西海。兵不鈍鋒。若此之事。
皆上天威。明社稷。神武非徒人力所能立也。聖
朝寬仁。覆載允信。允文大啓爵命。以示四方。魯
及胡濩皆享萬戶之封。魯之五子各受千室之

邑胡濩子弟部曲將校爲列侯將軍以下千有
餘人百姓安堵四民反業而建約支屬皆爲鯨
鯢超之妻孥焚首金城父母嬰孩覆尸許市非
國家鍾禍於彼降福於此也逆順之分不得不
然夫擊鳥先高攫鷙之勢也牧野之威孟津之
退也今者枳棘翦扞戎夏以清萬里肅齊六師
無事故大舉天師百萬之衆與匈奴南單于呼
完厨及六郡烏桓丁令屠各湟中羌僰寔奮席
卷自壽春而南又使征西將軍夏侯淵等率精

甲五萬及武都氏羌巴漢銳卒南臨汶江。搃據
庸蜀江夏襄陽諸軍。橫截湘沅。以臨豫章。樓船
橫海之師。直指吳會。萬里尅期。五道並入。權之
期命。於是至矣。丞相銜奉國威。爲人除害。元惡
大憝。必當梟夷。至於枝附葉從。皆非詔書所特
禽疾。故每破滅彊敵。未嘗不務在先降。後誅。拔
將取才。各盡其用。是以立功之士。莫不翹足引
領。望風響應。昔袁術僭逆。王誅將加。則廬江太
守劉勲先舉其衆。還歸國家。呂布作亂。師臨下

邳張遼侯成率衆出降還討睦固薛洪穆尚開
城就化官渡之役則張郃高奐舉事立功後討
袁尚則都督將軍馬延故豫州刺史陰夔射聲
校尉郭昭臨陣來降圍守鄴城則將軍蘇游反
爲內應審配兄子開門入兵旣誅袁譚則幽州
大將焦觸攻逐袁熙舉縣來服凡此之輩數百
人皆忠壯果烈有智有仁悉與丞相參圖畫策
折衝討難芟敵搃旗靜安海內豈輕舉措也哉
誠乃天啓其心計深慮遠審邪正之津明可否

之分。勇不虛死。節不苟立。屈伸變化。惟道所存。故乃建邱山之功。享不訾之祿。朝爲讐虜。夕爲上將。所謂臨難知變。轉禍爲福者也。若夫說誘甘言。懷寶小惠。泥滯苟且。沒而不覺。隨波漂流。與燖俱滅者。亦甚衆多。吉凶得失。豈不哀哉。昔歲軍在漢中。東西懸隔。合肥遺守。不滿五千。權親以數萬之衆。破敗奔走。今乃欲當禦雲霓。難以冀矣。夫天道助順。人道助信。事上之謂義。親親之謂仁。盛孝章君也。而權誅之。孫輔兄也。而

權殺之。賊義殘仁。莫斯爲甚。乃神靈之逋罪。下
民所同讐。辜讐之人。謂之凶賊。是故伊摯去夏。
不爲傷德。飛廉死紂。不可謂賢。何者。去就之道。
各有宜也。丞相深惟江東。舊德名臣。多在載籍。
近魏叔英。秀出高峙。著名海內。虞文繡。砥礪清
節。耽學好古。周參明。當世雋彥。德行修明。皆宜
膺受多福。保乂子孫。而周盛門戶。無辜被戮。遺
類流離。湮沒林莽。言之可爲愴然。聞魏周榮。虞
仲翔。各紹堂構。能負析薪。及吳諸顧。陸舊族長。

者。世有高位。當報漢德。顯祖揚名。又諸將校孫
權。婚親皆我國家良寶利器。而並見驅逐。兩絕
於天。有斧無柯。何以自濟。相隨顛沒。不亦哀乎。
蓋鳳鳴高岡。以遠尉羅。賢聖之德也。鸛鳴之鳥。
巢於葦苕。苕折子破。下愚之惑也。今江東之地。
無異葦苕。諸賢處之。信亦危矣。聖朝開弘曠蕩。
重惜民命。誅在一人。與衆無忌。故設非常之賞。
以待非常之功。乃霸夫烈士奮命之良時也。可
不勉乎。若能翻然大舉。建立元勳。以膺顯祿。福

之上也。如其未能。竿量大小。以存易亡。亦其次也。夫繫蹄在足。則猛虎絕其蹠。蝮蛇在手。則壯士斷其節。何則。以其所全者重。所棄者輕。若乃樂禍懷甯。迷而忘復。闇大雅之所保。背先賢之去就。忽朝陽之安。甘折菖之末。日忘一日。以至覆沒。大兵一放。玉石俱碎。雖欲救之。亦無及已。故令往購募爵祿科條如左。檄到詳思至言。如詔律令。

Blank page with vertical lines and significant staining.

版文

爲袁紹拜烏丸三王爲單于版文

遼西烏丸大人邱力居上谷烏丸大人
難樓各稱王而遼東屬國烏丸大人蘇
僕延自稱峭王右北平烏丸大人烏延
自稱汗魯王後邱力居死從子蹋頓代
立總攝三王袁紹與公孫瓚連戰蹋頓
助紹擊瓚破之紹矯制賜蹋頓難峭王
汗魯王印綬
皆爲單于

使持節大將軍督幽青并領冀州牧阮鄉侯紹
承制詔遼東屬國率衆王頒下烏丸遼西率衆
王蹋頓右北平率衆王汗盧維乃祖慕義遷善

欵塞內附北捍獫狁東拒濊貊世守北陲爲百
姓保鄣雖時侵犯王畧命將徂征厥罪率不旋
時悔愆變改方之外夷最又聰慧者也始有千
夫長百夫長以相統領用能悉乃心克有勲力
於國家稍受王侯之命自我王室多故公孫瓚
作難殘夷厥土之君以侮天慢王是以四海之
內並執干戈以衛社稷三王奮氣裔土忿奸憂
國控弦與漢兵爲表裏誠甚忠孝朝所嘉焉然
而虎兕長蛇相隨塞路王官爵命否而無聞夫

有勲不賞。俾勤者怠。今遣行謁者楊林齋單于
璽綬車服。以對爾勞。其各綏靜部落。敎以謹慎。
無使作凶作慝。世復爾祀位。長爲百蠻長。厥有
咎有不臧者。泯於爾祿。而喪於乃庸。可不免乎。

設難

應譏

客有譏余者云。聞君子動作周旋。無所苟而已矣。今主君鍾陰陽之美。總賢聖之風。固非世人所能及。遭豺狼肆虐。社稷隕傾。旣不能抗節服義。與主存亡。而背枉違難。耀茲武功。徒獨震撲山東。剝落元元。結疑本朝。假拒羣奸。使已蒙尊沓之謗。而他人受討賊之勲。捐功棄力。以德取怨。今賤文德而貴武勇。任權譎而背舊章。無乃

非至德之純美。而有闕於後人哉。主人曰。是何言也。夫兵之設。亦久矣。所以威不軌而懲淫慝也。夫申鳴違父。樂羊食子。季友鴆兄。周公戮弟。猶忍而行之。王事所不得已也。而況將避讒慝之嫌。棄社稷之難。愛暫勞之民。忘永康之樂。此庸夫猶所不爲。何有冠世之士哉。昔洪水滔天。汎濫中國。伯禹躬之。過門而不入。率萬方之民。致力乎溝洫。及至簫韶九成。百獸率舞。垂拱無爲。而天下宴如。夫豈前好勤而後媮樂乎。蓋以

彼勞求斯逸也。夫世治責人以禮。世亂則考人以功。斯各一時之宜。故有論戰陣之權於清廟之堂者。狂矣。陳俎豆之器於城濮之墟者。則悖矣。是以達人君子。必相時以立功。必揆宜以處事。孝靈旣喪。姦官放禍。棟臣殘酷。宮室焚火。主君乃芟凶族。夷惡醜。蕩滌朝奸。清澄守職也。旣乃卓爲封蛇。幽鳩帝后。強以暴國。非力所討。違而去之。宜也。是故天贊人和。無思不至。用能合師百萬。若運諸掌者。義也。今人主以寬弘爲宗。

仁義爲廬若地之載如天之幬故當其聞管籥
之聲則恐民之病也見羽毛之美則懼士之勞
也察稼穡之不時則推民之匱也臨臺觀之崇
高則恤役之病也是以虛心恭已取人之謨闢
四門廣諫路貴讜言賤巧僞慮不專行功不擅
美咨事若不及求讐恐不聞用能使賢智者盡
其策勇敢者竭其身故舉無遺闕而風烈宿宣
也

樂府

飲馬長城窟行

樂府瑟
調曲

飲馬長城窟。水寒傷馬骨。往謂長城吏。慎莫稽
留太原卒。官作自有程。舉築諧汝聲。男兒當
格鬪。死何能怫鬱。築長城。長城何連連。連連三
千里。邊城多健少。內舍多寡婦。作書與內舍。便
嫁莫畱住。善侍新姑嫜。時時念我故夫子。報書
往邊地。君今出語一何鄙。身在禍難中。何爲稽
留他家子。生男慎莫舉。生女哺用脯。君獨不見

長城下。死人骸骨相撐拄。結髮行事君。慊慊心
意開。明知邊地苦。賤妾何能久自全。少玉臺作
見往一作

與關一
作間

詩

遊覽二首

高會時不娛，羈客難爲心。殷懷從中發，悲感激
清音。投觴罷歡坐，逍遙步長林。蕭蕭山谷風，默
默天路陰。惆悵忘旋反，歔歔涕沾襟。默默一作黯黯襟一作

巾作

其二

節運時氣舒，秋風涼且清。閒居心不娛，駕言從
友生。翱翔戲長流，逍遙登高城。東望看疇野，廻

陳詩三集 卷三 三
顧覽園庭嘉木凋綠葉芳草纖紅榮騁哉日月
逝年命將西傾建功不及時鐘鼎何所銘收念
還房寢慷慨詠墳經庶幾及君在立德垂功名

宴會

凱風飄陰雲白日揚素暉良友招我遊高會宴
中闈立鶴浮清泉綺樹煥青蕤後闕

本傳

初曹丕爲五官將及平原侯植皆好文學粲與北海徐幹字偉長廣陵陳琳字孔璋陳留阮瑀字元瑜汝南應瑒字德璉東平劉楨字公幹並見友善琳前爲何進主簿進欲誅諸宦官太后不聽進乃召四方猛將並使引兵向京城欲以劫恐太后琳諫進曰易稱卽鹿無虞諺有掩目捕雀夫微物尚不可欺以得志況國之大事其可以詐立乎今將軍總皇威握兵要龍驤虎步

高下在心。以此行事。無異於鼓洪爐以燎毛髮。但當速發雷霆。行權立斷。違經合道。天人順之。而反釋其利器。更徵於他。大兵合聚。疆者爲雄。所謂倒持干戈。授人以柄。必不成功。祇爲亂階。進不納其言。竟以取禍。琳避難冀州。袁紹使典文章。嘗爲紹檄酷詆曹操。袁氏敗。琳歸操。操謂曰。卿昔爲本初移書。但可罪狀孤而已。惡惡止其身。何乃上及父祖邪。琳謝罪。操愛其才而不咎。瑀少受學於蔡邕。建安中都護曹洪欲使掌

書記瑀終不爲屈操並以琳瑀爲司空軍謀祭
酒管記室軍國書檄多琳瑀所作也琳作諸書
及檄草成呈操操先苦頭風是日疾發卧讀琳
所作翕然而起曰此愈我病數加厚賜操嘗使
瑀作書與韓遂時操適近出瑀隨從因於馬上
具草書成呈之操擘筆欲有所定而竟不能增
損琳徙門下督瑀爲倉曹掾屬

陳記室集終

